

癸

巳

類

稿

癸巳類稿卷六

黻俞正燮理初

持素證篇第三

手太陰經肺藏脈證三之一

靈樞本神云肺藏氣氣舍魄虛則塞鼻不利少氣實則喘喝胃  
盈仰以息喜樂無極則傷魄狂意不存皮革焦毛悴色天死於  
夏

靈樞經脈云手太陰之脈是動則病肺脹滿彭彭而喘欬缺盆  
中痛甚則交兩手而脅此爲臂厥是主肺所生病者欬上氣喘  
渴煩心胃滿臑臂內前廉痛厥掌中熱氣實有餘則肩背痛風  
寒汗出中風小便數而欠氣虛則肩背痛寒少氣不足以息溺  
色變手太陰氣絕則皮毛焦太陰者行氣溫於皮毛者也故氣

不榮則皮毛焦津液去皮節爪枯毛折毛先死丙篤丁死手太陰之別曰列缺其病實則手銳骨掌熱虛則欠欬小便遺數

靈樞邪客云肺有邪其氣留於兩肘

靈樞五邪云邪在肺則病皮膚痛寒熱上氣喘汗出欬動於肩

背

素問刺要論云肺動則秋病溫瘧泝泝然寒慄

素問風論云肺風之狀多汗惡風色餅然白時欬短氣晝日差暮甚診在眉上其色白

素問刺熱論云肺熱病者先淅然厥起毫毛惡風寒舌上黃身熱熱爭則喘欬痛走胷膺背不得太息頭痛不堪汗出而寒肺熱病者右頰先赤

素問痿論云肺熱葉焦則皮毛虛弱急薄著則生痿躄肺者藏

之長也心之蓋也有所失亡所求不得則發肺鳴葉焦也肺熱者色白而毛敗

素問癰論云肺癰煩滿喘而嘔

靈樞脹論云肺脹者虛滿而喘欬

素問欬論云肺欬而喘息有音甚則唾血

素問瘧論云瘧瘧者肺素有熱氣盛於身不外泄風寒舍於皮膚之內分肉之間而發熱而不寒消燂肌肉曰瘧瘧

素問刺瘧云肺瘧令人心寒寒甚熱熱間善驚如有所見者

素問厥論云手太陰厥逆虛滿而欬善嘔沫

素問藏氣法時論云肺病下舖慧日中甚夜半靜肺欲收肺病者喘欬逆氣肩背痛汗出尻陰股膝髀腓足皆痛虛則少氣不能報息耳聾噤乾

素問示從容論云夫傷肺者脾氣不守胃氣不清經氣不爲使  
真藏壞決經脈旁絕五藏漏洩不喘則喘

素問氣厥論云心移寒於肺肺消肺消者飲一溲二死不治心  
移熱於肺傳爲鬲消

素問標本病傳論云肺病喘欬病傳脅支滿痛身重體痛脹不  
已死

靈樞五閱五使云肺病者喘息鼻張

素問大奇論云肺滿實卽爲腫肺壅喘而兩胫滿肺脈沈搏爲  
肺疝

素問病能論云肺氣大脈大則不得偃臥

素問脈要精微論云肺脈搏堅而長當病唾血其栗而散者當  
病泄汗

素問五藏生成論云白脈之至也喘而浮上虛下實驚有積氣在胷中喘而虛名曰肺痺寒熱得之醉而使內也

靈樞邪氣藏府病形云肺脈急甚癰疾微急肺寒熱怠惰欬唾

血引要背胷鼻息肉不通緩甚多汗微緩痿癯偏風頭以下汗

出不可止大甚脛腫微大肺痺引胷背起惡日光小甚泄微小

消痺滑甚息賁

賁音奔息賁肺積名在右脅下

上氣微滑上下出血

肺及大腸

瀉甚

嘔血微瀉鼠瘻在頸支腋之間下不勝其上其應善痿

音酸足輭

素問水熱穴論云腎至陰肺太陰也其本在腎其末在肺皆積

水也故水病腎爲附腫肺爲逆不得臥相輸俱受水氣所留

靈樞寒熱病云臂太陰可汗出足陽明可汗出陰汗甚止之於

陽陽汗甚止之於陰

手陽明經大腸府脈證三之二

靈樞經脈云手陽明之脈是動則病齒痛頸腫是主津液所生病者曰黃口乾鼻衄喉痹肩前臑痛大指次指痛不用氣有餘則當脈所過者熱腫虛則寒慄不復手陽明之別曰偏歷實則齟齬虛則齒寒痹隔

靈樞邪氣藏府病形云大腸病腹中切痛而鳴濯濯冬日重感於寒卽泄當齊而痛不能久立魚絡血

靈樞脈論云大腸脹腸滿而痛濯濯冬日重感於寒則洩泄不化

素問厥論云手陽明厥逆發喉痹益腫瘕

素問欬論云大腸欬狀欬而遺矢

素問氣厥論云小腸移熱於大腸爲虛癢爲沈

足陽明經胃府脈證三之三

靈樞經脈云足陽明之脈是動則病洒洒振寒善呻數欠顏黑  
病至則惡人與火聞木聲則惕然而驚心欲動獨閉戶塞牖而  
處甚則欲上高而歌棄衣而走賁也響腹脹是謂訖厥是主血  
所生病者狂瘡温淫汗出鼽衄口喎脣脰頸腫喉痹大腹水腫  
膝腫腫痛循膺乳氣街股伏兔胛外廉足跗上皆痛中指不用  
氣盛則身已前皆熱其有餘於胃則消穀善饑溺色黃氣不足  
則身以前皆寒慄胃中寒則脹滿足陽明之別曰豐隆氣逆喉  
痹卒暗實則狂顛虛則足不收脛枯

素問脈解云陽明病洒洒振寒脛腫而股不收上喘而爲水胸  
痛少氣甚則厥客孫絡則頭痛鼻鼽腹腫

靈樞邪氣藏府病形云胃病面熱腹填脹胃脘當心而痛上支  
兩脅膈咽不通食飲不下



素問繆刺論云邪客於足陽明之經令人鼽衄上齒寒

靈樞終始云陽明終者口目動作喜驚妄言色黃其上下之經盛而不行則終矣

素問風論云風氣與陽明入胃人肥熱中目黃人瘦寒中泣出胃氣之狀頸多汗惡風食飲不下鬲塞不通腹善滿失衣則填脹食寒則泄診形瘦而腹大

素問熱論云傷寒二日陽明受之身熱目痛鼻乾不得臥八日陽明病衰身熱少愈其病兩感於寒者二日則陽明與太陰俱病腹滿身熱不欲食譫言

案俗工以張機傷寒卒病論文辭不能諧俗乃視爲隱奧同道相詆輒曰某人遇傷寒大證卽不得下手實則已亦不知傷寒爲何等病也傷寒卽溫病亦曰黃病往往傳人其干時

令者曰疫俗亦謂之瘟言有惡神主之高僧傳云宋元嘉四年邵信遇傷寒病無人敢看卽瘟疫懼傳染也韓詩外傳庶子好方者言上古醫曰第父以芫爲席以芻爲狗北面而祝之發十言耳諸扶輿而來者皆平復如故中古醫曰踰跗樹木爲腦芷草爲軀吹竅定腦死者復生謂治傷寒厥也張機處方以大劑治之可云精敏承學以爲小小風寒沈困者不悟張君處方之源遂沒其意今采素問脈證各入其經中合他證於各經觀之義無隱矣

靈樞師傳云胃中熱則消穀令人懸心善飢齊以上皮熱腸中熱則出黃如糜齊以下皮寒胃中寒則腹脹腸中寒則腸鳴滄泄胃中寒腸中熱則脹而且泄胃中熱腸中寒則疾飢小腹痛

脹

靈樞脹論云胃脹腹滿胃脘痛鼻聞焦臭妨於食大便難

素問厥論云陽明之厥癰疾欲走呼腹滿不得臥面赤而熱妄見而妄言陽明厥逆喘欬身熱善驚衄嘔血

素問刺要痛云陽明令人要痛不可以顧顧如有見者善悲

素問欬論云胃欬之狀欬而嘔嘔甚則長蟲出五藏六府皆令人欬聚於胃關於肺使人多涕唾而面浮腫氣逆也

案蟲生於肝風亦聚於胃關於肺西溪叢語引許叔微云類爪末治肺蟲月之初四初六服之是二日肺蟲上行是唐人

語與千金方同姚寬試之有驗

素問刺瘡云足陽明之瘡先寒洒洒寒甚久乃熱熱去汗出喜見日月光火氣乃快然

素問刺瘡云胃瘡者令人且病也善飢而不能食食而支滿腹

大

素問陰陽別論云二陽之病發心脾有不得隱曲女子不月其傳爲風消其傳爲息賁者死不治

素問氣厥論云大腸移熱於胃善食而瘦日食亦

素問標本病傳論云胃病脹滿病傳少腹要脊痛斷瘦背脊筋痛小便閉身體重不已死

素問四時刺逆從論云陽明有餘病脈痺身時熱不足病心痺滑則病心風疝瀉則病積時善驚

素問脈要精微論云胃脈搏堅而長其色赤當病折脾其稟而散者當病食痺

素問脈要精微論云診得胃脈而急實則脹虛則泄風成爲寒熱痺成爲消中厥成爲癱疾久風爲搶泄脈風成爲癘

案癩卽鶴神病癩卽大麻風及洋癩瘡均以治胃爲急素問  
風論云癩者熱肘氣不清鼻柱壞色敗皮膚瘍潰風寒客脈  
不去所謂風氣與太陽俱入脈輪肌肉憤臙而有瘍由太陽  
達面部牽連十二經及胸臍藏府也古人不喜正言之故謂  
之惡疾神仙感遇傳云崔言得疾眉髮自落鼻梁崩倒肌膚  
得瘡如疥皆目爲惡疾不可救有異人教以皂莢刺燒灰大  
黃丸蒸丸曬爲末以大黃湯調服之鬚髮自生此今方書先  
用九龍丸攻下之意又按酉陽雜俎云北齊李庶無鬚博陵  
崔謨調之日何不以錐刺頤作數十孔拔左右好鬚者栽之  
庶曰持此還施貴族勳眉有驗然後執鬚崔家時有惡疾故  
庶以此調之應卽指言事然則言疾愈鬚髮生而眉竟落矣  
唐高僧傳云齊武平時梁州薛河寺僧遠爲性疎誕不修細

行好逐流蕩歡讌爲任眼邊有烏點洗拭之眉毛一時隨手  
落盡是落眉卽癢如洋嶽爲流蕩疾也周庚信鄭偉墓誌云  
消渴連年屢有相如之患迄於大漸遂如范增之疾桐君對  
藥分闕神明李柱侍醫更無方伎銘云梧桐茂苑楊柳倡家  
千金迴雪百日流霞荆零倏忽悽愴榮華河陽古樹金谷殘  
花亦此疾也苕溪漁隱叢話云劉貢父晚年得惡疾鬚眉墜  
落鼻梁斷壞愴感慚愧轉加困劇而斃東坡先有大風起兮  
眉飛揚安得壯士兮守鼻梁之謔其事不見劉攽傳而檢東  
坡志林有一條云元豐六年十月十二夜有得風疾者口不  
能言死生之爭有甚於刀鋸木索者知其不可救默爲祈死  
而已此復何罪乎酒色之娛而已必係劉事元豐應作元祐  
攽兄傲亦知永興軍惑官妓得驚眩疾但時猶謂之風未有

洋嶽名明嘉靖時汪道貫贈王穉登詩云身上楊梅瘡作果  
眼中萊菔翳爲花其名楊梅以形象言之也蜀檮杌云潘炕  
雙美妾解愁遂風恙成疾癸辛雜識亦言閩俗過癩墜耳塌  
鼻斷手足而殞謂卽大風疾是其疾亦由男女誤合東坡志  
林引左傳女陽物又言淫則生內熱蠱惑之疾故淫者不爲  
蠱則爲風皆風熱生濕展轉不已深可懼也又按文選辨命  
論注引韓詩云芣苢傷夫有惡疾也薛君云芣苢澤泄臭惡  
之草詩人傷其君子有惡疾人道不通求已不得發憤而作  
爾雅云芣苢馬舄爲今車前草而薛君云澤泄皆利濕藥詩  
言有惡疾又言人道不通又言采芣苢非今之洋嶽而復何  
惡疾也哉唐王勣外臺秘要引素女經云七傷之情不可不  
思第六之忌新息沐浴頭身髮濕舉重作事流汗如雨以合

陰陽風冷必傷少腹急痛要脊疼強四肢酸疼五藏防禦上  
攻頭面或生漏瀝云出古今錄驗二十五卷中所云四肢酸  
疼上攻頭面其證皆合隋巢元方諸病源候二十四花癩候  
云風濕客於皮膚與血氣相搏其肉突出外如花開狀二十  
五反花瘡候云初生如飯粒破則血出生惡肉有根肉出反  
散如花諸惡瘡久不瘥者亦然又頭面身體諸瘡諸久瘡皆  
云肉熱外虛風濕所乘初生如炮隨瘡隨發又諸惡瘡候云  
風熱挾濕毒之氣浸淫瘡候云風熱發於肌膚無名瘡候云  
如惡瘡或接或劇風熱搏於血氣所生所云惡瘡久不瘥直  
洋嶽也唐孫思邈千金寶要方云交合畢蒸熱得氣以菖蒲  
末白梁粉敷令燥則濕瘡不生又云治陰惡瘡以蜜煎甘草  
末塗之則專指肝經癩疔魚口便毒宋寶漢卿瘡瘍全書言



癰瘡由與生疔瘡之婦人交合熏其毒氣而生明嘉靖時汪  
機本草會編李時珍本草綱目萬厯時陳實功外科正宗均  
有楊梅毒名明時朝鮮許俊東醫寶鑑雜病篇云天泡瘡一  
名楊梅毒瘡與癩大同生面上形如鼓釘生毛髮者如棉花生  
兩陰尻臀筋骨上者如紫蒲萄生乳脇者如濕爛楊梅毒其如  
魚脬中多白水者爲天泡多由肝脾腎風濕熱之毒因男女  
房室傳染時珍言正德間楊梅毒始盛又云來自嶺表故又  
名廣瘡其時始立專門治法萬厯時王肯堂外科證治準繩  
言由肝腎濕熱所致天啟時張介賓景岳全書言衝脈所感  
西洋人身圖說正面全身言小腹下橫骨爲發便毒之所凡  
與女人汗穢者交橫骨受熱乃內動發便毒及棉花楊梅毒等  
瘡或受寒熱亦成此證實則素問風與太陽入脈膈爲盡其

理太陽連督脈貫十二經膀胱壞胃熏肺術士不深求且不  
讀古書不知楊梅當作洋擬實卽風瀉也其方藥用土茯苓  
乾荷葉李時珍謂土茯苓卽東山經榮莫應作中山經鼓鐙  
山榮草古書多教人服松脂茯苓薏苡仁抱樸子言上黨趙  
瞿癩垂死服松脂澆水燕談錄言齊州僧晉明風疾眉髮落  
百骸腐潰異人教服松根類參長三五寸味苦者其於風瀉  
尤有成驗然神仙服食者多居山澤雲霧中故主利濕藥息  
土之民非有濕疾不當服食也

素問大奇論云胃脈沈鼓瀆胃外鼓大鬲偏枯男子發左女子  
發右不啗舌轉可治三十日起其從者啗三歲起年不滿二十  
者三歲死

素問痿論云治痿者獨取陽明陽明者五藏六府之海主潤宗

筋宗筋主束骨而利機關也衝脈者經脈之海也主滲灌谿谷  
與陽明合於宗筋陰陽總宗筋之會會於氣街而陽明爲之長  
皆屬於帶脈而絡於督脈故陽明虛則宗筋弛帶脈不引故足  
痿不用也

足太陰經脾藏脈證三之四

靈樞本神云脾藏營營舍意虛則四支不用五藏不安實則腹  
脹經洩不利憂愁不解則傷意四支不舉毛悴色夭死於春

靈樞經脈云足太陰之脈是動則病舌本強食則嘔胃脘痛腹

脹善噫得後與氣則快然如衰

言能大便與下  
氣則快然而減

身體皆重是主

脾所生病者舌本痛體不能動搖食不下煩心心下急痛溇瘕  
泄水閉黃疸不能臥強立股膝內腫厥足大指不用足太陰氣  
絕則脈不榮肌肉屑舌者肌肉之本也脈不榮則肌肉軟肉萎

人中滿脣反肉先死甲篤乙死足太陰之別日公孫脈氣上逆則霍亂實則腸中切痛虛則鼓脹脾之大絡日大包實則身盡痛虛則百節盡縱

素問脈解云太陰病脹上走心爲噫

靈樞終始云太陰終者腹脹閉不得息氣噫善嘔嘔則逆逆則面赤不逆則上下不通上下不通則面黑皮毛焦而終矣

靈樞邪客云脾有邪其氣留於兩髀

靈樞五邪云邪在脾胃則病肌肉痛陽氣有餘陰氣不足則熱中善飢陽氣不足陰氣有餘則寒中腸鳴腹痛陰陽俱有餘若俱不足則有寒有熱

素問刺要論云脾動則七十二日四季之月病腹脹滿而不嗜

食

素問風論云脾風之狀多汗惡風身體怠惰四支不欲動色薄  
微黃不嗜食診在鼻上其色黃

素問熱論云傷寒四日太陰受之腹滿噎乾十日太陰病衰腹  
減如故則思飲食

素問痿論云脾氣熱則胃乾而渴肌肉不仁發爲肉痿有漸於  
濕以水爲事若有所留居處相失肌肉滿潰痺而不仁得之濕  
地也脾熱者色黃而肉蠕動

素問刺熱論云脾熱病者先頭痛頰痛煩心顏青欲嘔身熱熱  
爭則要痛不可用俯仰腹滿泄兩頰痛脾熱病者鼻先赤

素問痺論云脾痺者四支解惰發欬嘔汁上爲大寒風寒濕三  
氣雜至合爲痺風勝爲行痺寒熱勝爲痛痺濕勝爲著痺  
靈樞脹論云脾脹善噦四支煩悅體重不能勝衣臥不安

素問厥論云太陰之厥腹滿臙脹後不利不欲食食則嘔不得  
卧太陰厥逆所急擊心痛引腹

素問刺要痛云散脈令人要痛而熱熱甚生煩要下如有橫脈  
居其中甚則遺洩

素問刺瘧云足太陰之瘧令人不樂好太息不嗜食多寒熱汗  
出病至則善嘔嘔已乃衰病減也

素問刺瘧云脾瘧者令人寒腹中痛熱則腹中鳴鳴已汗出  
素問欬論云脾欬則右肱下痛陰陰引肩背甚則不可以動動  
則欬劇

素問示從容論云四肢解惰脾精之不行也喘欬者水氣并陽  
明也血泄者脈急血無所行也

素問奇病論云脾痺津液在脾故令人口甘內熱中滿氣上溢

轉爲消渴治之以蘭除陳氣也

素問藏氣法時論云脾病日昃慧日出甚下舖靜脾欲緩脾病者身重善飢肉萎足不收行善癢脚下痛虛則腹滿腸鳴滲泄食不化

素問示從容論云脾虛令人體重煩冤脾虛守似肺然從容得之

素問氣厥論云腎移寒於脾雍腫少氣腎移熱於脾傳爲虛腸澀不治

素問標本病傳論云脾病身痛體重病傳脾少腹要脊痛脛痠背脊筋痛小便閉不已死

靈樞五閱五使云脾病者唇黃

素問大奇論云脾脈外鼓沈爲腸澀久自己

素問四時刺逆從論云太陰有餘病肉痺寒中不足病脾痺滑則病風疝瀉則病積心腹時痛

素問脈要精微論云脾脈搏堅以長其色黃當病少氣其栗而散色不澤者當病骨脛腫若水狀也

素問五藏生成論云黃脈之至也大而虛有積氣在腹中有厥氣名曰厥疝女子同法得之疾使四支汗出當風

靈樞邪氣藏府病形云脾脈急甚爲癰瘕微急膈中食飲入而還出後沃沫便不實也緩甚痿厥微緩風痿四支不用心慧然若無

病大甚擊仆微大疝氣腹裏大膿血在腸胃外疝氣應作疝氣此一證非兩證也據腹中論此亦曰伏梁與心積名同上齊爲逆乃裏膿血也難經五十六難脾積曰痞氣其名正出於此小甚寒熱微小消瘴滑甚潰癢微滑蟲毒蝮蝎瀉甚腸癰應是微瀉內癰多下膿血



手少陰經心藏脈證三之五

靈樞本神云心藏脈脈舍神虛則悲實則笑不休怵惕思慮則

傷神破脈

玉篇云  
破中胎

脫肉毛悴色天死於冬

靈樞經脈云手少陰之脈是動則病盛乾心痛渴而欲飲是爲  
臂厥是主心所生病者目黃脅痛膈臂內後廉痛腋掌中熱痛  
手少陰氣絕則脈不通血不流髦色不澤面黑如漆柴血先死  
壬篤癸死五陰氣俱絕則日系轉目運志先死遠一日半死矣  
手少陰之別曰通里實則支膈虛則不能言

靈樞邪客云心有邪其氣留於兩肘

靈樞五邪云邪在心則病心痛喜悲時眩仆

素問刺要論云心動則夏病心痛

素問風論云心風之狀多汗惡風焦絕善怒嚇赤色病甚則言

不可快診在口其色赤

素問刺熱云心熱病者先不樂數日乃熱熱爭則卒心痛煩懣善嘔頭痛面赤無汗心熱病者顏先赤

素問痿論云心氣熱則下脈厥而上上則下脈虛虛則生脈痿摺折掣脛縱而不任地也悲哀大甚則胞絡絕陽氣內動發則心下崩數洩血也故木病曰大經空虛發爲肌痺傳爲脈痿心熱者色赤而脈溢

素問痺論云心痺脈不通煩則心下鼓暴上氣而喘噎乾善噫厥氣上則恐

靈樞脈論云心脈煩心短氣卧不安

素問厥論云手少陰厥逆心痛引喉身熱死不可治

素問方盛衰論云少陰之厥令人妄夢其極至迷

素問刺瘵云心瘵者令人煩心甚欲得清水反寒多不甚熱

素問欬論云心欬則心痛喉中介介如梗狀甚則咽腫喉痺

靈樞厥病云真心痛手足青至節死腎厥心痛與背相控善瘵  
如從後觸其心胃厥心痛甚腹脹胸滿脾厥心痛如以錐鋒刺  
其心痛甚肝厥心痛色蒼蒼如死狀終日不得太息肺厥心痛  
卧如徒居痛間作益甚色不變心腸痛愷腫往來休止腹熱渴  
漚出是蛟蚘也

素問藏氣法時論云心病日中慧夜半甚平旦靜心欲粟心病  
者胸中痛脅支滿脅下痛膺背肩胛間痛兩臂內痛虛則胸腹  
大脅下與要相引而痛

素問氣厥論云肝移寒於心狂膈中肝移熱於心則死

素問標本病傳論云心病心痛病傳欬脅支痛閉塞不適身痛

體重不已死

靈樞五閱五使云心病者舌卷短顙赤

素問大奇論云心脈滿大痲癢筋掣心脈小急不鼓爲瘵心脈搏滑急爲心疝心脈小堅急高偏枯男子發於左女子發於右

與胃脈同

素問脈要精微論云診得心脈而急病名心疝少腹當有形小腸爲之應也

素問脈要精微論云心脈搏堅以長當病卷舌不能言其栗而散者當消環自己

素問五藏生成論云赤脈之至也喘而堅診曰有積氣在中時善於食名曰心痺得之外疾思慮而心虛故邪從之

靈樞論疾診尺云女子手少陰脈動甚者妊子

靈樞邪氣藏府病形云心脈急甚癎筋筋癎筋微急心痛引背食

不下緩甚狂笑微緩伏梁在心下上下行心積名時唾血大甚

喉疥發大心痺引背善淚出也善多小甚善噓微小消瘿血液滑

甚善渴微滑心痛引齊小腹鳴瀝甚瘡微瀝血溢血損維厥二

脈耳鳴顛疾

手太陽經小腸府脈證三之六

靈樞經脈云手太陽之脈是動則病嗑痛頰腫不可以顧肩似  
拔膈似折是主液所生病者耳聾目黃頰腫頸領肩膈肘臂外  
後廉痛手太陽之別日支正實則節弛肘廢虛則生疔小者如  
指痲疥

靈樞邪氣藏府病形云小腸病小腹痛要脊控睪而痛時窘之

後言痲痺時欲當耳前熱若寒甚肩熱甚手小指次指之間

熱脈陷

素問舉痛論云寒氣客於小腸膜原之間絡血之中血泣同不得注於大經血氣稽留不得行故宿昔而成積矣寒氣客於小腸小腸不得成聚故後泄腹痛矣熱氣留於小腸腸中痛癰熱焦渴則堅乾不得出故痛而閉不通矣

素問痺論云腸痹者數飲而出不得中氣喘爭時發洩泄靈樞脈論云小腸服少腹臃服引要而痛

素問厥論云手太陽厥逆耳聾涕出項不可顧要不可俯仰素問欬論云小腸欬而失氣氣與欬俱失

素問氣厥論云膀胱移熱於小腸高腸不便上爲口糜

素問著至教論云三陽上下無常合而病至謂合膀胱并至如風雨

上爲顛疾下爲漏病積并則爲驚九竅皆塞腸氣滂溢乾喉

塞并於陰心腎則上下無常薄爲腸澀坐不得起卧

足太陽經膀胱府脈證三之七

靈樞經脈云足太陽之脈是動則病衝頭痛目似脫項如拔脊痛要似折髀不可以曲膈如結膈如裂是爲蹠厥是主筋所生病者痔瘡狂顛疾頭顛卽凶字從頁從息或從息誤項痛目黃淚出軌衄項背要尻膈扁脚背痛小指不用足太陽之別曰飛揚實則軌衄頭背痛虛則軌衄

按元史李杲傳云王善甫病小便不利目睛凸出腹脹如鼓膝以上堅硬欲裂杲曰內經有之膀胱者津液之府必氣化乃出焉杲元子言無陽者陰無以生無陰者陽無以化是不宜甘淡滲泄之陽藥明日投羣陰之劑而愈

素問脈解云太陽病腫要腫痛病偏虛爲蹠強上引背耳鳴甚

則狂顛疾浮爲壘入中爲瘖內奪而厥爲瘖俳

蓋樞邪氣藏府病形云膀胱病小腹偏腫而痛以手按之卽欲小便而不得肩熱脈陷足小指外廉及脛踝後皆熱脈陷蓋樞終始云太陽終也戴眼反折瘰癧其色白絕皮乃絕汗則終矣

素問三部九候云氣絕者其足不可以屈申死必戴眼瞳子高者太陽不足也

蓋樞經脈云六陽氣絕則陰與陽相離腠理發泄絕汗乃出故旦占夕死夕占旦死

素問風論云風氣與太陽俱入脈踰肌肉憤臙而有瘍

素問至真要大論云太陽之勝痔陰中乃瘍隱曲不利互引陰

股筋肉拘苛血脈凝泣

同

澀絡滿色變或爲血泄皮膚否腫腹滿



食減熱反上行頭項凶頂腦戶中滿目如脫

素問熱論云巨陽者諸陽之屬也其脈連於風府人之傷於寒也一日巨陽受之頭項痛要脊強七日巨陽病衰頭痛少愈其病兩感於寒者一日則巨陽與少陰俱病頭痛口乾煩懣

靈樞脈論云膀胱脹少腹滿而氣瘞

素問厥論云巨陽之厥腫首頭重足不能行發爲晦仆太陽厥逆偃仆嘔血善衄

素問刺要痛云足太陽脈令人要痛引項脊尻背如至重狀解脈令人要痛引肩目眩眩然時遺溲痛如引帶常如折要狀善恐衝絡之脈令人要痛不可以俯仰仰則恐仆得之舉重傷要衝絡絕惡血歸之會陰之脈令人要痛痛上漯漯

極字

然汗出汗

乾令人欲飲飲已欲走飛揚之脈令人要痛痛上怫怫然甚則

悲以恐

素問刺瘧論云足太陽之瘧要痛頭重寒從背起先寒後熱熇熇暍暍然熱止汗出

素問欬論云膀胱欬而遺溺

靈樞五味論云膀胱之胞薄以懦得酸則縮卷約而不通水道不行矣

案此胞卽脬字膀胱也戰國策云癘雍腫胞疾史記倉公傳風痺客脬難于大小溲溺赤又氣疝客於膀胱難於前後溲而溺赤是也若氣厥論胞移熱于膀胱則是胞脈

素問氣厥論云胞移熱於膀胱則癰溺血

素問陰陽別論云三陽發病發寒熱下爲癰腫及爲痿厥臄痛

其傳爲索澤

血潤膚枯

其傳爲癰疔

素問標本病傳云膀胱病小便閉病傳少腹脹要脊痛肝瘦腹  
脹身體重不已死

素問四時刺逆從論云太陽有餘病骨痺身重不足病腎痺滑  
則病腎風疝滿則病積時善巔疾

素問著至教論云三陽并至

言必并小腸

上為巔疾下為漏病三陽

積并為驚九竅塞嗑乾喉塞并于陰

心

則上下無常薄為腸辟

直心坐不得起卧

### 足少陰經腎藏脈證三之八

靈樞木神云腎藏精精舍志虛則厥實則脹五藏不安盛怒不  
止則傷志忘前言要脊不可俯仰屈伸毛悴色天死於季夏恐  
懼不解則傷精骨痠痿厥精時自下

靈樞經脈云足少陰之脈是動則病飢不飲食面如漆柴效壘

則有血喝喝而喘坐而欲起目眈眈如無所見心如懸若飢狀  
氣不足則善恐心惕惕如人將捕之是爲骨厥是主腎所生病  
者口熱舌乾咽腫上氣盛乾及痛煩心心痛黃疸腸澼脊股內  
後廉痛痿厥嗜卧足下熱而痛爲此諸病灸則強食生肉緩帶  
被髮大杖重履而步足少陰氣絕則骨枯少陰者冬脈也伏行  
而濡骨髓者也骨不濡則肉不能著骨肉不相親肉軟却齒長  
而垢髮無澤骨先死戊篤已死足少陰之別曰大鍾氣逆則煩  
悶實則閉癱虛則要痛

素問脈解云少陰病色色不能久立少氣善怒名曰煎厥惡聞  
食臭面黑如地色欬則有血血見於鼻

靈樞終始云少陰終者面黑齒長而垢腹脹閉塞上下不通

素問著至教論云腎且絕惋惋日暮從容不出人事不殷

靈樞邪客云腎有邪其氣留於兩腳

靈樞五邪云邪在腎則病背痛陰痺案之而不得腹脹要痛大便難肩背頸項痛時眩

素問刺要論云腎動則冬病脹要痛

素問水熱穴論云勇而勞甚則腎汗出腎汗出逢於風內不得入於藏府外不得越於皮膚客於元府行於皮裏傳爲肘腫本之於腎名曰風水所謂元府者汗空同也

素問風論云腎風之狀多汗惡風面龐然浮腫脊痛不能正立其色黃隱曲不利診在肌上其色黑

素問熱論云傷寒五日少陰受之口燥舌乾而渴十一日少陰

病衰渴止不滿此兼去大陰病舌乾已而嘔此兼去陽明病

素問痿論云腎氣熱則要脊不舉骨枯而髓減發爲骨痿有所

遠行勞倦逢大熱而渴渴則陽氣內伐內伐則熱舍於腎腎者水藏也今水不勝火則骨枯而髓虛故足不任身發爲骨痿故下經曰骨痿者生於大熱也腎熱者色黑而齒槁

素問刺熱云腎熱病者先要痛脰痠苦渴數飲身熱熱爭則項痛而強脰寒且痠足下熱不欲言其逆則項痛員員澹澹然腎熱病者頤先赤

素問痺論云腎痺者善脹尻以代踵脊以代頭

靈樞脈論云腎脹腹滿引背央央然要髀痛

素問方盛衰論云少陰之厥令人妄夢其極至迷

手足一經同

素問厥論云少陰之厥口乾溺赤腹滿心痛少陰厥逆虛滿嘔變下泄清

素問刺要痛云足少陰令人要痛痛引脊內廉昌陽之脈令人

要痛痛引膈目眩眩然甚則反折舌卷不能言

素問刺瘧云足少陰之瘧令人嘔吐甚多寒熱熱多寒少欲閉戶塞牖而處

素問刺瘧云腎瘧者令人洒洒然要脊痛宛轉大便難目眩眩然手足寒

素問欬論云腎欬則要背相引而痛甚則欬涎

靈樞終始云手屈而不伸者其病在筋手伸而不屈者其病在骨

素問解精微論云志悲者惓惓則沖陰沖陰則志去目神不守精涕泣出厥則陽氣并於上火獨光陰并於下足寒服故目皆

盲

素問藏氣法時論云腎病夜半慧四季甚

謂雞鳴食時  
日昃日入

下饋靜

腎欲堅腎病者腹大脛腫喘欬身重寢汗出

謂盜汗

憎風虛則腹

中痛大腹少腹痛滿厥意不樂

素問示從容論云腎虛令人體重煩冤腎小浮似脾然從容得之

素問氣厥論云肺移寒于腎爲涌水涌水者按腹不堅水氣客於大腸疾行則鳴濯濯如囊裹漿水之病也肺移熱於腎傳爲柔痊

素問標本病傳論云腎病少腹要脊痛脘痠病傳背胛筋痛小便閉腹脹兩脅支痛不已死

靈樞五閤五使云腎病者顴與顏黑

素問四時刺逆從論云少陰有餘病皮痹隱胗不足病肺痺滑則病肺風疝瀉則病積澁血



素問脈要精微論云腎脈搏堅而長其色黃而赤者當病折要其要而散者當病少血

素問五藏生成論云黑脈之至也上堅而大有積氣在小腹與陰名曰腎癰

即奔豚在少腹下上至心下

得之沐浴清水涼水而卧

素問示從容論云於此有人頭痛筋攣骨重怯然少氣噫噎腹滿時驚不嗜卧脈浮而弦切之石堅夫浮而弦者是腎不足也沈而石者是腎氣內著也怯然少氣者是水道不行形氣消索也欬嗽煩悅者是腎氣之逆也

靈樞邪氣藏府病形云腎脈急甚骨癭疾微急沈厥奔豚足不收不得前後

謂大便緩甚折脊

謂要微緩洞洞者食不化下嗝還

出大甚陰痿微大石水起齊以下至小腹腫腫然上至胃脘死不治小甚洞泄微小消痺滑甚癰癢微滑骨癢坐不能起起則

目無所見瀆甚大癰微瀆不月沈痔

素問奇病論云有病龐然如有水狀切其脈大緊身無痛者形不疲不能食食少病生在腎名爲腎風腎風而不能食善驚驚已心氣痿者

素問評熱病論云有病腎風者月事不來胞脈閉也

素問脈要精微論云肝與腎脈并至其色蒼赤當病毀傷不見血已見血濕若中水也

素問奇病論云腎滿實卽爲腫腎雍脚下至小腹滿脛有大小髀胫大跛易偏枯腎脈小急不鼓爲癢大急沈爲疝小搏沈爲腸澼下血血溫身熱者死肝腎并沈石水浮風水小弦者驚虛死

素問水熱穴論云腎者至陰盛水也肺太陰也少陰者冬脈也

其本在腎其末在肺皆積水也腎者胃之關也關門不利故聚水而從其類也上下溢於皮膚故爲胛腫胛腫者聚水而生病也腎者牝藏也地氣上者屬于腎而生水液也故曰至陰

督脈任脈衝脈胞脈胞府蹻脈帶脈維脈證三之九

素問骨空論云督脈爲病脊強反折督脈病從少腹上衝心痛不得前後爲衝疝其女子不任癰痔遺溺隘乾督脈生病治督脈治在骨上甚者在齊下管其上氣有音者治其喉中央在缺盆中者謂任及胃其病上衝喉者治其漸漸者上俠頤也

靈樞經脈云督脈之別曰長強實則脊強虛則頭重高搖之俠脊之有過者

素問骨空論云任脈病男子內結七疝女子帶下瘕聚

靈樞經脈云任脈之別曰尾翳實則腹皮痛虛則痒搔

素問氣穴論云背與心相控而痛所治天突與十椎

王冰云七椎及

上紀上紀胃脘也下紀關元也背胛邪繫陰陽左右如此其病前後痛瀆胸脇痛而不得息不得臥上氣短氣偏痛脈滿起斜出尻脈絡胸脇支心貫鬲上肩加天突斜下肩交十椎下

素問骨空論云衝脈爲病逆氣急裏

靈樞百病始生云虛邪之中人也著於伏衝之脈揣之應手而動發手則熱氣下於兩股如湯沃之狀

素問舉痛論云寒氣客於衝脈則脈不通脈不通則氣因之喘動應手

靈樞順逆肥瘦云衝脈別絡結則跗上不動厥寒

素問評熱病論云月事不來胞脈閉也胞脈者屬心而絡於胞中今氣上迫肺心氣不得下通故月事不來也

素問奇病論云胞之絡脈繫於腎少陰之脈貫腎繫舌本故重身九月不能言

靈樞水脹云石瘕生於胞中寒氣客於子門子門閉惡不泄衄留益大狀如懷子月事不以時下

素問痺論云胞痺者少腹膀胱按之內痛若沃以湯澀於小便上爲清涕

素問痿論云悲哀太甚則胞絡絕胞絡絕則陽氣內動發則心下崩數溲血也

素問大奇論云脈至如懸縷是胞精予不足也病善言下霜而死不言可治

懸縷一作弦縷

素問氣厥論云胞移熱於膀胱則癰溺血

素問繆刺論云邪客於陽膈之脈令人目痛從內眥起

靈樞脈度云蹻脈氣不營則目不合

靈樞癩狂云脈脹而縱不滿者灸帶脈於要相去三寸

素問痿論云陽明虛帶脈不引故足痿不用

素問刺要痛云陽維之脈使人要痛痛上拂拂然腫

手心主厥陰經心包絡脈證三之十

靈樞經脈云心主手厥陰心包絡之脈是動則病手心熱臂肘  
舉急腋腫甚則胸脅支滿心中憺憺大動面赤目黃喜笑不休  
是主脈所生病者煩心心痛掌中熱手心主之別曰內關實則  
心痛虛則頭強

素問厥論云手心主厥逆心痛引喉身熱死不可治

靈樞邪客云心主之脈內絡心肺謂二經脈心藏邪不能客客則死

故諸邪在心者皆在心包絡少陰外經病而藏不病

手少陽經三焦府脈證三之十一

靈樞經脈云手少陽之脈是動則病耳聾渾渾焮焮噎噎喉痺是主氣所生病者汗出目銳皆痛頰腫耳後肩臑肘臂外皆痛小指次指不用手少陽之別曰外關實則肘擊虛則不收

靈樞本輸云三焦並太陽之正實閉癢虛遺溺

靈樞邪氣藏府病形云三焦病腹氣滿小腹尤堅不得小便窘急溢則水留卽爲脹

靈樞脹論云三焦脹氣滿於皮膚中輕輕然而不堅

素問厥論云手少陽厥逆發喉痺噎腫瘰

素問欬論云三焦欬而腹滿不欲食飲

素問調經論云陽虛寒氣在外上焦不通則寒氣獨留於外故寒慄陰虛穀氣不盛上焦不行下脘不通胃氣熱熏胸中故內

熱陽盛上焦不通利元府汗空不通衛氣不得泄越故外熱陰盛厥氣上逆寒氣積於胸中而不泄溫氣去寒獨留則血凝泣凝則脈不通其脈盛大以瀼故中寒

靈樞邪氣藏府病形云身半以上邪中之也身半以下濕中之也

靈樞小鍼解云氣之在脈也邪氣之中人也高故邪氣在上寒溫不適飲食不節病生腸胃故濁氣在中清濕地氣之中人必從足始故清氣在下

素問至真要大論云諸厥固泄者皆屬於下諸痿喘嗽者皆屬於上

靈樞終始云從要以上者手太陰陽明皆主之從要以下者足太陰陽明皆主之



靈樞邪氣藏府病形云邪中面下陽明中項下太陽中頰下少陽中膺背兩脅亦中其經中陰從臂胫藏不能容遺之於府靈樞上膈云氣爲上膈食飲入而還出蟲爲下膈寒汁流於腸中則蟲寒積聚守於下管腸胃充郭

營衛脈證三之十二

靈樞營衛生會云汗或出面或出於背或出於身半其不循衛氣之道而出命曰漏泄

靈樞禁服云細察衛氣爲百病母

靈樞脈論云營氣循脈衛氣逆者爲脈脹衛氣並脈循分者爲膚脹

靈樞水脹云寒氣客於腸外與衛氣相搏氣不得營因有所繫痺而內著惡氣乃起息肉乃生大如雞卵稍成如懷子按之則

堅推之則移月事以時下

靈樞壽夭剛柔云營病寒熱少氣衛病氣痛時來時去悌慎賁

嚮

南

風寒客於腸胃寒痺之為病也時痛皮不仁

靈樞衛氣失常云衛氣蓄積苑蘊支脅胃中滿喘呼逆息

素問調經論云風雨之中人血氣與邪並客於分肉之間其脈  
堅大故曰實寒濕之中人也皮膚不收肌肉堅緊營氣泣衛氣  
去故曰虛虛者聾辟

素問四時刺逆從論云血氣外溢令人少氣血氣環逆令人上  
氣血氣內著令人脈脹血氣竭解體內却善恐上逆善怒善忘  
氣不外行令人臥不欲動血氣內散令人寒栗血氣皆脫令人  
目不明內氣外泄留為大癩陽氣內竭令人善忘

素問方盛衰論云氣之多少陽從左陰從右老從上少從下是

以氣多少逆皆爲厥一上不下寒厥到膝少者秋冬死者秋

冬生氣上不下頭痛顛疾求陽不得求陰不審五部隔無徵若

居曠野若伏空屋絲絲乎屬不滿日言頭痛厥難知病者意亦無聊

素問氣穴論云絡脈以溢奇邪以通營衛營衛稽留衛散營溢  
氣竭血著外爲發熱內爲少氣溢氣邪壅脈熱肉敗營衛不行  
必將爲膿內消骨髓外破大腸留於節湊必將爲敗積寒留舍  
營衛不居卷肉縮筋肋肘不得申內爲骨痹外爲不仁命曰不  
足大寒留於谿谷

素問調經論云氣血以并陰陽相傾氣亂於衛血逆於經血氣  
離居一實一虛血并於陰氣并於陽故爲驚狂血并於陽氣并  
於陰乃爲臆中血并於上氣并於下心煩怒善怒血并於下氣  
并於上亂而喜忘血氣并走於上爲大厥暴死氣復反則生不

反則死

按韓詩外傳云尸厥者股陰溫耳焦焦如有啼者聲可活也  
史記扁鵲傳云魏太子尸蹙耳鳴而鼻張循兩股至陰尚溫  
股陰溫是氣能下耳鳴鼻張是將反也故曰復反則生

素問逆調論云人之肉苛者雖近衣絮猶尚苛也營氣虛衛氣  
實也營氣虛則不仁衛氣虛則不用營衛俱虛則不仁且不用  
曰死

靈樞終始云痒痛者陰也痛而以手按之不得者陰也痒者陽  
也

靈樞壽夭剛柔云病有形而不痛者陰完而陽傷之也無形而  
痛者陽完而陰傷之也

靈樞周痹云周痹者在於血脈之中隨脈以上隨脈以下居分

肉之間真氣不能周

靈樞刺節真邪論云虛邪偏客於身半其入深內居營衛營衛稍衰則真氣去邪氣獨留發爲偏枯淺者偏痛

素問風論云風氣與太陽俱入行諸脈膈散於分肉之間與衛氣相干其道不利故使肌肉憤脹而有瘍衛氣有所凝而不行故其肉有不仁也癘者有營氣熱腑其氣不清故使其鼻柱壞而色敗皮膚瘍潰風寒客於脈而不去名曰癘風或亦名曰寒熱

素問生氣通天論云因於氣爲腫四維相代陽氣乃竭

靈樞玉版云喜怒不測飲食不節陰氣不足陽氣有餘營氣不行乃發爲癰疽陰陽不通兩熱相搏乃化爲膿

靈樞癰疽云寒客經絡血泣不通衛氣歸之不得復反故腫寒

化爲熱熱勝則腐肉爲膿爛筋傷骨肌肉不相管脈漏熏蒸  
靈樞上膈云蟲寒守下管腸胃充郭衛氣不營邪氣居之蟲上  
食則下管虛邪氣勝之積聚已留則癰成癰在管內痛深外痛  
浮癰上皮熱

素問調經論云病在脈調之血在血調之絡病在氣調之衛  
靈樞營衛生會云日中而陽隴爲重陽夜半而陰隴爲重陰日  
入陽盡而陰受氣矣平旦陰盡而陽受氣

素問疏五過論云嘗貴後賤雖不中邪病從内生名曰脫營精  
神內傷身必敗亡嘗富後貧名曰失精雖不中邪皮焦筋屈癢  
瘰爲癰五氣留連病有所并不在藏府不變形軀身體日減氣  
虛無精病深無氣洒洒然時驚病深者以其外耗於衛內奪於  
營良工所失不知病情

素問疏五過論云當合男女離絕菟結憂恐喜怒五藏空虛血氣離守工不能知何術之語

素問方盛衰論云至陰盛天氣絕至陽盛地氣不足陰陽并交至人之所行陰陽并交者陽氣先至陰氣後至是以聖人持診之道先後陰陽而持之

足少陽經膽府脈證三之十三

靈樞經脈云膽足少陽之脈是動則病口苦善太息心脅痛不能轉側甚則面微有塵體無膏澤足外反熱是爲陽厥是主骨所生病者頭痛頷痛目銳眦痛缺盆中腫痛腋下腫馬刀俠瘦汗出振寒瘡胷脅肋脾膝外至脛絕骨外踝前及諸節皆痛小指次指不用足少陽之別曰光明實厥虛則痿躄坐不能起素問脈解篇云少陽病心脅痛不可反側甚則墮

靈樞邪氣藏府病形云臆病善太息口苦歐宿汁心下憺憺恐人將捕之盛中哢哢然數唾

靈樞終始云少陽終者耳聾百節盡縱目系絕一日半則死矣其死也色青白乃死

素問熱論云傷寒三日少陽受之胷脅痛耳聾九日少陽病衰耳聾微聞其兩感於寒者三日少陽與厥陰俱病耳聾囊縮而厥水漿不入不知人六日死

靈樞脹論云臆脹腋痛脹口中苦善太息

素問厥論云少陽之厥暴聾頰腫而熱脅痛疔不可以運少陽厥逆機關不利要不可以行項不可以顧發腸癰不可治驚者死

素問刺要痛云少陽令人要痛如以鍼刺其皮中循循然不可



以俯仰不可以顧同陰之脈令人要痛如小錐居其中怫然腫  
肉里之脈令人要痛不可以欬欬則筋縮急

素問刺瘧云足少陽之瘧令人身體解體寒不甚熱不甚惡見  
人見人心惕惕然熱多汗出甚

素問欬論云膽欬歐膽汁

素問奇病論云膽痺者數謀慮而不決膽虛則氣上溢而口爲  
之苦

素問氣厥論云胃移熱於膽亦曰食亦胃見膽移熱於腦則頰辛  
鼻淵鼻淵者濁涕下不止也傳爲衄蟻瞋目

素問陰陽別論云一陽發病少氣善欬善泄其傳爲心掣其傳  
爲高

素問四時刺逆從論云少陽有餘病筋癰脅滿不足病肝痺澀

則病肝風疝瘕則病積時筋急目痛

足厥陰經肝藏脈證三之十四

靈樞本神云肝藏血血舍魂虛則恐實則怒悲哀動中則傷魂  
狂妄不精不正陰縮筋攣兩脅骨不舉毛悴色天死於秋

靈樞經脈云足厥陰之脈是動則病要痛不可以俯仰丈夫癩  
疝婦人少腹腫甚則藍乾面塵脫色是肝所生病者胃滿噎逆  
滄泄狐疝遺溺閉癢足厥陰氣絕則筋絕厥陰者肝脈也肝者  
筋之合也筋者聚於陰器而脈絡於舌本也故脈弗榮則筋急  
引舌與卵脣青舌卷卵縮筋先死庚篤辛死足厥陰之別曰蠶  
溝氣逆則羸腫卒疝實則挺長虛則暴痒

素問脈解云厥陰病脈脹不通癩癧疝甚則熱中

靈樞終始篇云厥陰終者中熱藍乾喜溺心煩盛則舌卷卵上

縮

靈樞邪客云肝有邪其氣留於兩腋

靈樞五邪云邪在肝則兩脅中痛寒中惡血在內行善掣節時  
脚腫耳問青脈掣

素問刺要論云肝動則春病熱而筋弛

素問解精微論云風之中目也陽氣內守於精是火氣燔目故  
見風則泣下也有以比之火生風乃能雨此之類也

素問風論云肝風之狀多汗惡風善悲色微蒼嗑乾善怒時憎  
女子診在目下其色青

素問熱論云傷寒六日厥陰受之煩滿而囊縮十二日厥陰病  
衰囊縱少腹微下大氣皆去病日已矣

素問舉痛論云寒氣客於脈中則血泣脈急脅肋與少腹相引

痛

素問痿論云肝氣熱則膽泄口苦筋膜乾則筋急而攣發爲筋痿思想無窮所願不得意淫於外入房太甚宗筋弛縱發爲筋痿及爲白淫故下經口筋痿者生於肝使內也肝熱者色蒼而爪枯

素問刺熱云肝熱病者小便先黃腹痛多臥身熱熱爭則狂言及驚脅滿痛手足躁不得安臥肝熱病者右頰先赤

素問痺論云肝痺者夜臥則驚多飲數小便上爲引如憤

靈樞脹論云肝脹脅下滿而痛引少腹

素問厥論云厥陰之厥少腹腫痛腹脹經溲不利好臥屈膝陰縮腫脰內熱厥陰厥逆攣要痛虛滿前閉譴言三陰俱逆不得前後使入手足寒三日死前陰者春夏陰氣少秋冬陽氣衰此

人者質壯以秋冬奪於所用下氣上爭不能復精氣溢下邪氣因從之而上陽氣日損陰氣獨在故手足爲之寒也熱厥腎氣日衰陽氣獨勝故手足爲之熱也逆則陽氣亂則不知人也

素問刺要痛云厥陰之脈令人要痛要中如張弓弩弦其病令

人善言多

言默默然不慧無聊賴不言則

素問欬論云肝之欬則兩脅下痛甚則不可以轉轉則兩胛下滿

素問刺瘞云足厥陰之瘞令人要痛少腹滿小便不利如瘞狀

非瘞也數使意恐懼氣不足腹中悒悒

素問刺瘞云肝瘞者令人色蒼蒼然太息其狀若死者

靈樞終始云手屈而不伸病在筋伸而不屈病在骨

素問藏氣法時論云肝病平旦慧下晡甚夜半靜肝欲散肝病

者兩脅下痛引少腹令人善怒虛則目眦眦無所見耳無所聞  
善恐如人將捕之氣逆則頭痛耳聾不聰頰腫

素問示從容論云肝虛令人體重煩冤肝急沈散似腎從容得  
之

素問腹中論云肝傷脅支滿妨於食病至則先聞腥臊臭出  
清液先唾血四支清目眩時前後血便月事衰少不來

素問氣厥論云脾移寒於肝雍腫筋攣脾移熱於肝爲驚衄

素問標本病傳論云肝病頭目眩脅支滿病傳體重身痛脹要  
脊少腹痛脛痠不已死

靈樞五閱五使云肝病者皆青

素問四時刺逆從論云厥陰有餘病陰痹不足病生熱痺滑則  
病狐疝風溼則病少腹積氣

素問脈要精微論云肝脈搏堅以長色不青當病墜若搏傷門因血在脅下令人喘逆其裏而散色澤者當病溢飲

素問五藏生成論云青脈之至也長而左右彈有積氣在心下

支脈名曰肝痹得之寒濕與疝同法要痛足清涼也頭脈緊

靈樞邪氣藏府病形云肝脈急甚惡言微急肥氣在脅下左脅若

覆杯緩甚善嘔微緩水瘕痹大甚內癰善嘔衄微大肝痹陰縮

欬引小腹小甚多飲血不足也微小消痺滑甚瘕疝微滑遺溺瀉甚

溢飲上不勝水溢於四支微瀉瘕疝筋痹

素問脈要精微論云肝與腎脈並至其色蒼赤當病毀傷不見血已見血濕若中水也

素問大奇論云肝滿實卽爲臃肝雍兩肢滿臥則驚不得小便肝脈小急痲筋攣肝脈驚暴有所驚駭脈不至若瘖自已肝

脈小急不鼓爲癢肝腎並沈爲石水並浮爲風水並小弦欲驚  
並虛爲死肝脈大急沈疝肝脈小緩爲腸澼易治心肝澼亦下  
血二藏同病者可治其脈小沈澼爲腸澼其身熱者死熱見七  
日死

經筋證三之十五

靈樞經筋云足太陽勝之筋其病小指支跟腫痛脰攀脊反折

項筋急肩不舉腋支缺盆中紐痛不可左右搖伸春痺

足少陽膽之筋其病小指次指支轉筋引膝外轉筋膝不可屈

申脈筋急前引髀後引尻卽上乘眇季脅痛上引缺盆膺乳頸

維筋急從左之右從右之左右目不開上過右角並蹠脈而行

左絡於右故傷左角右足不用右則反之名曰維筋相交孟春痺

足陽明胃之筋其病足中指應轉筋脚跳堅伏兔轉筋髀前腫



潰疔腹筋急引缺盆及頰卒口僻急者目不合熱則筋縱目不  
開頰筋有寒則急引頰移口有熱則筋弛縱不勝收故僻治之  
以馬膏膏其急者以白酒和桂以塗其緩者以桑鈎鈎之卽以  
生桑炭置之坎中高下以坐等以膏熨急頰且飲美酒噉美炙  
肉不飲酒者自強也爲之三拊而已急者口日爲僻昔急不能  
卒視季春痹也

足太陰脾之筋其病足大指支內踝痛轉筋痛膝內輔骨痛陰  
股引憊而痛陰器紐痛上引齊兩脅痛引膺中脊背痛孟秋痹  
也

足少陰腎之筋其病足下轉筋及所過而結者皆痛及轉筋病  
在此者主病癢及癢在外者不能俯在內者不能仰故陽病者  
要反折不能俯陰病者不能仰此筋折紐紐發數甚者死仲秋

痺也

足厥陰脈之筋其病足大指及內踝之前痛內輔痛陰股痛轉筋陰器不用傷於內則不起傷於寒則陰縮入傷於熱則縱挺不收治在行水清陰氣也季秋痺

手太陽小腸之筋其病小指支肘內銳骨後廉痛循臂陰入腋下腋下痛腋後廉痛繞肩胛引頸而痛應耳中鳴痛引領目瞑良久乃得視頸筋急則爲筋痿頸腫當所過者支轉筋筋急則口目爲僻背急不能卒視仲夏痺

手少陽三焦之筋其病當所過者支轉筋舌卷季夏痺

手陽明大腸之筋其病當所過者支痛及轉筋肩不舉頸不可左

右視孟夏痺也

手太陰肺之筋其病當所過者支轉筋痛甚成息賁齋急吐血

仲冬癩

手心主

厥陰

之筋其病當所過支轉筋前及胷痛息賁孟冬癩

手少陰

之筋其病內急心承伏梁下爲肘網當所過者支轉

筋筋痛其成伏梁唾膿血者死不治經筋之病寒則反折筋急熱則筋弛縱不收陰痿不用陽急則反折陰急則俛不申季冬癩也

靈樞經脈云脈弗營則筋急筋急則引舌與卵

素問痿論云陽明虛則宗筋縱足痿不用

靈樞衛氣失常云血氣之輸輸於諸絡血氣留居則盛而起筋也

素問生氣通天論云陽氣因於濕首如裹濕熱不攘大筋縶短小筋弛長縶短爲拘弛長爲痿

素問皮部論云邪之始入於皮也泝然起毫毛開湊理其入於絡也則絡脈盛色變其入客於經也則感虛乃陷下其留於筋骨之間寒多則筋攣骨痛熱多則筋弛骨消肉燥脰破毛直而敗

素問生氣通天論云大怒有傷於筋縱其若不容汗出偏阻使人偏枯汗出見濕乃生痲痺膏粱之變是生大疔

素問疏五過論云嘗當大傷斬筋絕脈身體復行令澤不息故傷敗結留薄歸陽膿積寒炁粗工治之亟刺陰陽身體解散四支轉筋

絡脈左注右右注左上下相干證三之十六

素問繆刺論云邪客於足少陰<sup>腎</sup>之絡令人卒心痛暴脹脅脅

支滿手少陽<sup>三焦</sup>之絡令人喉痺舌卷口乾心煩臂外廉痛手不

及頭足厥陰

肝

之絡令人卒疝暴病足太陽

膀胱

之絡令人頭項

肩痛手陽明

大腸

之絡令人氣滿胸中喘息而支胠胷中熱邪客

於臂掌之間

手三陰絡

不可得屈人有所墮墜惡血留內腹中滿脹

不得前後先飲利藥此上傷厥陰之脈

肝

下傷少陰之絡

腎

邪

客於手陽明

大腸

之絡令人耳聾時不聞音耳中生風足陽明

胃

之經

王冰云以其脈左右交於面部故舉經明

繆刺令人衄鼻上齒寒足少陽

膽

之絡

令人齋痛不得息欬而汗出足少陰之絡

腎

令人嗑痛不可納

食無故善怒氣上走贛上噎中腫不得內唾時不得出唾

此爲經之

直者絡亦當作經

足太陰

脾

之絡令人要痛引少腹控眇不可以仰息

膈

之絡令人

足太陽

膀胱

之絡令人拘攣背急引齋而痛足少陽

膽

之絡令人

留於樞中痛脾不可舉邪客於手足少陰

心

太陰

肺

足陽明

胃

之絡此五絡皆會於耳中上終左角五絡俱竭令人身脈皆動

而形無知也其狀若尸日尸厥刺之不已以竹管吹其兩耳鬢其左角之髮方一寸燂治飲以美酒一杯不能飲者灌之邪客於經左盛則右病右盛則左病亦有移易者左病未已而右脈先病如此者非絡也

脈證雜比略例三之十七

素問至真要大論云諸風掉眩皆屬於肝諸暴強直皆屬於風諸痛痒創皆屬於心諸熱瞋瘵諸禁鼓慄如喪神守諸逆衝上諸躁狂越諸病附腫痛痠驚駭皆屬於火諸脹腹大諸病有聲鼓之如鼓諸轉反戾水液渾溜諸吐酸暴注下迫皆屬於熱

謂熱

諸濕腫滿皆屬於脾諸瘕項強皆屬於濕諸氣膈鬱皆屬

於肺諸寒收引皆屬於腎諸病水液澄澈清冷皆屬於寒諸厥

因泄皆屬於下諸痿喘咳皆屬於上故大要曰謹守病機各司

其屬有者求之無者求之盛者責之虛者責之必先五勝疏其血氣令其調達而致和平

素問平人氣象論云欲知寸口太過與不及寸口之脈中手短者曰頭痛長者曰足脛痛促上擊者肩背痛沈而堅者病在中浮而盛者病在外沈而弱曰寒熱及疝瘕少腹痛沈而橫者脅下有積腹中有橫積痛沈而喘者寒熱盛滑堅者病在外小實而堅者病在內小弱以濇謂之久病滑浮而疾謂之今病急者疝瘕少腹痛滑曰風濇曰痺緩而滑熱中盛而緊曰脹

素問脈要精微論云粗大者陰不足陽有餘熱中也來疾去徐上實下虛爲厥顛疾來徐去疾上虛下實爲惡風也有脈俱沈細數者少陰厥也沈細數散者寒熱也浮而散者爲胸仆諸浮不躁者皆在陽則爲熱其有躁者在手諸細而沈者皆在陰則

爲骨痛其有靜者在足脈動一代者病在陽之脈也泄及便膿血諸過者切之瀋者陽氣有餘也滑者陰氣有餘也陽氣有餘爲身熱無汗陰氣有餘爲多汗身寒陰陽有餘則無汗而寒推而外之內而不外者有心腹積也推而內之外而不內者身有熱也推而上之上而不下要足清也推而下之下而不上頭項痛也按之至骨脈氣少者要脊痛而身有痺也

素問通評虛實論云邪氣盛則實精氣奪則虛氣虛者肺虛也氣逆者足寒也大熱病氣熱脈滿是謂重實經絡皆實是寸脈急而尺緩也滑則從瀋則逆也絡氣不足經氣有餘者脈口熱而尺寒也秋冬爲逆春夏爲從經虛絡滿者尺熱滿脈口寒瀋也春夏死秋冬生脈氣上虛尺虛是謂重虛行步佷然滑則生瀋則死寒氣暴上脈滿而實滑則生瀋則逆而死脈實滿手足



寒頭熱春秋生冬夏死脈浮而濇身有熱死其形易滿脈急大  
堅尺濇而不應從則生手足溫也逆則死手足寒也孔子病熱  
脈懸小手足溫則生寒則死孔子中風熱喘鳴肩息脈實大也  
緩則生急則死腸澼便血身熱則死寒則生腸澼下白沫脈沈  
則生浮則死下膿血脈懸絕則死滑大則生腸澼身不熱脈不  
懸絕者脈滑大生懸濇死癩疾脈搏大滑久自己脈小堅急死  
不治癩疾之脈虛則可治實則死消輝脈實大病久可治脈小  
懸堅病久不可治

靈樞厥病云厥頭痛面若腫起煩心足陽明

胃

太陰

脾

也厥頭

痛頭脈痛心悲善泣視頭動脈盛者刺之調足厥陰

肝

也厥頭

痛貞貞頭重而痛手足少陰

腎

也厥頭痛項先痛要脊應之天柱及足

頭面動脈及足太陰

脾

也厥頭痛項先痛要脊應之天柱及足

太陽也

胃

厥頭痛頭痛甚耳前後涌脈有熱及足少陽

三焦

也真

頭痛頭痛甚腦盡痛手足寒至節死不治頭痛有所擊墮惡血

在內也太癩爲惡日作者不可已半寒痛者手足少陽

三焦

陽

明大腸也

靈樞禁服云人迎盛則爲熱虛則爲寒緊則爲痛癩代則乍間

乍甚寸口盛則脹滿寒中食不化虛則熱中出糜少氣溺色變

緊則痛癩代則乍痛乍止

素問陰陽別論云陰搏陽別謂之有子陽加於陰謂之汗陰虛

陽搏謂之崩

素問玉版論要云搏脈蹇痺寒熱之交

素問舉痛論云寒氣客於脈外則血少客于脈中則氣不通客

於脈外則脈寒客於脈中則脈滿客於衝脈則脈不通客於背

胸之脈則血脈泣客於厥陰之脈則血泣脈急

靈樞五禁云熱病脈靜汗已出脈盛躁逆也病泄脈洪大逆也  
著痺不移胸肉破身熱脈偏絕逆也淫而奪形身熱色天然白  
及後下血衄血衄篤重逆也寒熱奪形脈堅搏逆也

靈樞熱病云熱病三日而氣口靜人迎躁者泄其熱出其汗竇

其陰身熱甚陰陽俱靜者有死徵也七日八日脈口動喘而短

者汗且自出

當出肺汗

七日八日脈微小溲血口乾一日半而死脈

代者一日死熱病已得汗出而脈尚躁喘且復熱喘甚死七日

八日脈不躁躁不散數後

謂多大便

三日中有汗不汗四日死熱病

脈順可汗熱病已汗脈尚躁盛此陰脈之極也死其得汗而脈

靜者生熱病脈尚躁而不得汗者此陽脈之極也死脈盛躁得

汗靜者生

案元史李杲傳云馮櫟傷寒目赤頓渴脈七八至醫欲用承氣湯杲曰內經在脈諸數爲熱諸遲爲寒今七八至熱極矣而會要大論言病有脈從而病反者何也脈之而從按之不鼓諸陽皆然此傳爲陰證也以熱藥因寒用法處之汗出而愈

素問刺熱云太陽之脈色營額骨熱病也營未交且得汗與厥陰脈爭見者死期不過三日少陽之脈色營頰前營未交且得汗與少陰脈爭見者死期不過三日

素問腹中論云病熱者陽脈也陽入於陰乃臍脹而頭痛也素問瘧論云瘧氣者病在陽則熱而脈躁在陰則寒而脈靜

素問長刺節論云病在諸陽脈且寒且熱諸分且寒且熱名曰

狂

靈樞根結云皮肉菴焦而弱暴病取太陽氣無所止息痿疾起  
取陽明骨絲不安於地取少陽倉廩無所輸鬲洞取太陰氣絕  
喜悲取厥陰脈有所結脛不通取少陰

靈樞脹論云脈之應於寸口大堅以濇者脹也其陰爲藏陽爲  
府

靈樞癩狂云癩疾脈脹而縱厥逆爲病則脈大小皆濇

素問調經論云風雨之傷人也先客於皮膚傳入於孫絡傳絡  
脈輸大經脈血氣與邪並客於分淒之間其脈堅大

靈樞五色云切其脈口滑小緊以沈者病益甚在中人迎氣大  
緊以浮者病益甚在外脈口浮滑病日進人迎沈滑病日損脈  
口滑沈病日進在內人迎滑盛以浮病日進在外脈之浮沈人  
迎寸口大小等者病難已病在藏沈而大者易已小爲逆病在

府浮而大者易已人迎盛堅傷於寒寸口盛堅傷於食

靈樞終始云氣至而有效者虛者脈大如其故而不堅也實者脈如其故而益堅也病未去也

靈樞邪客云脈滑而盛病日進虛而細久以持大以濇爲病瘵陰陽如一者病難治

靈樞衛氣失常云支脅胃中滿喘呼逆息者診視其脈大而弦急及絕不至者及腹皮急甚者不可刺也

靈樞動輸云陽病而陽脈小者爲逆陰病而陰脈大者爲逆陰陽俱靜俱動若引繩相傾者病

靈樞玉版云腹脹身熱脈大逆腹鳴而滿四支清泄其脈大逆衄而不止脈大逆欬且瘦血脫形其脈小勁逆欬脫形身熱脈小以疾逆腹脹便血其脈大時絕逆欬瘦血形肉脫脈搏逆欬

血胷滿引背脈小而疾逆欬歐腹脹且滄泄其脈絕逆

素問平人氣象論云風熱而脈靜泄而脫血脈實病在中脈虛

病在外脈濇堅皆難治命曰反四時

玉機真藏論病在中脈堅實亦難治

素問玉機真藏論云脈盛皮熱腹脹前後不通悶瞀此謂五實  
死身汗得後利活脈細皮寒氣少泄利前後飲食不入此謂五  
虛死糲粥入胃泄注止活

靈樞小鍼解云五藏氣絕於內者脈口氣內絕不至絕於外者  
脈口氣外絕不至

素問大奇論云三陽急爲痲三陰急爲疝二陰急爲癘厥二陽  
急爲驚脈至而搏血衄身熱者死脈來懸鉤浮爲常脈脈至如  
喘曰暴厥不知與人言脈至如數使人暴驚三四日自己脈至  
浮合浮合如數一息十至以上是經氣予不足也脈至如火薪

然是心精予奪也脈至如散葉是肝氣予虛也脈至如省客省  
客者脈塞而鼓是腎氣予不足也懸去者棗華而死脈至如丸  
泥是胃精予不足也脈至如橫格是膽氣予不足也脈至如弦  
縷是胞精予不足也病善言下霜而死不言可治脈至如交漆  
交漆者左右傍至也微見三十日死脈至如涌泉浮鼓肌中太  
陽氣予不足也少氣者味韭英而死脈至如頽土之狀按之不  
得是肌氣予不足也五色先見黑白晶發死晶卽雷說文象回  
轉形雷發木玉也  
浮至如懸雍懸雍者浮揣切之益大是十二輸之予不足也脈  
至如偃刀偃刀者浮之小急按之堅大急五藏菹熱寒熱獨并  
於腎也如此其人不得坐立春而死脈至如丸滑不直手按之  
不可得也是大腸氣予不足也脈至如華令人善恐不欲坐臥  
行立常聽是小腸氣予不足也



素問陰陽類論云二陽陽一陰厥陰陽明主病不勝一陰脈厥陰而

動九竅皆沈三陽太陽一陰厥陰太陽脈勝一陰不能止內亂五藏

外為驚駭二陰少陰二陽陽明病在肺太陽少陰脈沈勝肺傷脾太陽外

傷四支二陰二陽皆交至病在腎少陰罵詈妄行癩疾為狂二陰

一陽少陽病出於腎陰氣客游於心腕下空竅堤閉塞不通四支

別離一陰一陽代絕此陰氣至心上下無常出入不知喉咽乾

燥病在土脾太陰二陽三陰太陰至陰少陰皆在陰不過陽陽氣不能

止陰陰陽並絕浮為血瘦沈為膿肘陰陽皆壯下至陰陽

素問五藏別論云凡治病必察其下適其脈觀其志意與其病

也病不許治者病不必治

素問四時調神論云四時陰陽者萬物之根本所以聖人春夏

養陽秋冬養陰以從其根故與萬物沈浮於生長之門道者聖

入行之愚者佩之是故聖人不治已病治未病不治已亂治未亂此之謂也

持素畢

目錄曰昭乎哉聖人之仁也上世淳意在心人神相語移精祝由先巫是用神農氏嘗藥分品上以養命中性下病垂利萬世黃帝坐明堂正天綱岐伯伯高鬼臾區少師少俞雷公以閱敏之才留意性命時則已有脈經上下篇脈要陰陽奇恒比類從容尺寸本病人事治數頗著其略鈎沈拾遺與鬼臾區積考十世天元冊文太古文章並奇作也其時學者受師未終將以亂經迷診天人長命黃帝哀焉乃垂聖慮勤樹天度以道求運以運證病經絡孫陸畢有道里宗氣營衛有生之常鍼灸之外湯藥至齊診有大方靜候氣口文分貧富勞佚肥瘦男女嬰壯勇

怯動病主病移病傳病久病新病奇病大奇廣設形證以求其  
合要道用全萬投萬中漢初猶傳脈書上下經五色診奇咳術  
揆度陰陽外變藥論石神接陰陽禁書後人誦其文字得一兩  
篇便以名術挾技索賂自謂奇特越人難經佗脈謚鍼皆習黃  
書編錄以意藏六府五心爲厥陰徒取口給用以診候違乎遠  
矣越人者自求表異是以更名自功使黃帝義滑佗業已焚中  
藏數篇出於雜綴診候之法尤異古經謚顛倒是非六藝所傳  
核之三古得謚詐僞又復竄改醫經絕人性理甲乙所列雜以  
難經文複義悖乃引易曰觀其所聚而天地之情可見矣豈非  
寒食散發逆理背常之書乎張機生於季漢有用素問醫術能  
賢斯人而已世多粗工不傳其業讀傷寒卒病文理並妙中雜  
王叔和言關格脈名異於正術然治本仲景亦未大損叔和脈

經宋賢所歎今得覽之正復愚謬人迎直脈上頭下胷居然不  
曉餘所抄集亦有迷替詐病詐處仲景戲謔亦采爲經何以示  
則王冰林億較注古籍拉彼人此使之淆亂然王氏頗能旁徵  
明堂惠貺後學晁公武乃謂靈樞晚出爲冰抄撮諸書是與謂  
中庸抄撮家語不全者何異劉完素有素問元機原病式沈作  
喆嘗取二經論天人之奧者離之合之正是之醫士李杲羅從  
謙滑壽丁贊汪機張介賓汪昂又仿難經甲乙經離析章句自  
爲篇第夫物不分則意隱方不聚則義偏諸君才力未足以語  
此譬之薛薄入海未能得寶得見洪濤與摩竭魚亦可謂之志  
士也人生受形頭腹手足經脈十二絡脈三百六十又五天運  
風濕熱火燥寒持脈急緩大小滑濇此古今所同醫所循用也  
徒以采擇不審條分不當末學不復推求謬云師說不同至謂

血氣亦有改革方書處病展轉取引題以經曰而失其句讀經  
或實無其語靈樞經脈明言經脈動病藏府脈骨筋氣主病素  
問刺瘡明言經瘡藏瘡自難經以下均經脈藏府不知是二隨  
意摭采惟古有訓具在簡札可覆視也漢志黃帝內經十八篇  
鍼經九素問九也鍼經分見隋書經籍志目唐又謂之九靈經  
一書二名者注說家自爲名目素問與靈樞相應素問名義如  
素王之素黃帝以大神靈徧索先師所借著之精光之論仍復  
請藏慎傳古人刑名八索九邱素索邱皆空也刑病皆空設之  
欲人不犯法不害性故曰湯液醪醴爲而不用嗚呼豈不仁哉  
律有庸醫殺人由所受多妄故采二經爲持素經水十二取濟  
作膠惟其用耳江海雖大非所及也庶比仲景用之之功且無  
失仁聖名素之義亦冀聰明英妙之士合而正之

脈篇第一

肺手太陰脈一之一

大腸手陽明脈一之二

胃足陽明脈一之三

脾足太陰脈一之四

心手少陰脈一之五

小腸手太陽脈一之六

膀胱足太陽脈一之七

腎足少陰脈附命門督脈任脈衝脈胞脈蹻脈帶脈維脈一

之八

手心主厥陰脈一之九

三焦手少陽脈附營衛三焦府一之十

膽足少陽脈一之十一

肝足厥陰脈附十二經筋一之十二

絡脈一之十三

十二經脈名義略例一之十四

持篇第二

天府乳下候二之一

氣口候二之二

人迎候二之三

三部九候二之四

太谿候二之五

衝陽候二之六

絡脈候二之七

氣口應候二之八

持氣口二之九

四時應持二之十

五藏應持二之十一

胃氣真藏應持二之十二

運氣不應持二之十三

氣血形色陰陽脈名持法雜比略例二之十四

證篇第三

手太陰經肺藏脈證三之一

手陽明經大腸府脈證三之二

足陽明經胃府脈證三之三

足太陰經脾藏脈證三之四



手少陰經心臟脈證三之五

手太陽經小腸府脈證三之六

足太陽經膀胱府脈證三之七

足少陰經腎藏脈證三之八

督脈任脈衝脈胞脈胞府蹻脈帶脈維脈證三之九

手心主厥陰經心包絡脈證三之十

手少陽經三焦府脈證三之十一

營衛脈證三之十二

足少陽經膽府脈證三之十三

足厥陰經肝藏脈證三之十四

經筋證三之十五

絡脈左注右注左上下相干證三之十六

脈證雜比略例三之十七

序曰右凡三篇四十五部悉采靈樞素問使成一家言斟酌經義文約法存也人通天地中列三才去泰去甚靈氣往來烝烝聖帝情見乎辭哀念衆子說又說之家別流分儒生不好工師執筆荅問顛倒亂我孔籍又亂黃書背常逆理罪在魏儒村翁以來至於小生巾月寤思庶幾神明用經證經以倫以次不煩極論畢陳古誼我舒憤懣志則無欺中人以上可以與知脈篇本也持篇法也處脈處方在四時應持五藏應持也處脈有時默念在心在胃氣應持運氣不應持也及其持時乃取證篇決別疑似廣神智也胃氣真藏與經脈證分部別居一知生死一知病處治十全也脈意微妙證有定方勿妄詮也君子懷刑有律篇也醫師慎此盛賄美譽又延年也言不過辭動不過則將

琴已類考

卷六

以仁術受福於天也

明正統九年